

NAFARROAKO GOBERNUA

GARAPEN EKONOMIKOA

ESKUBIDE SOZIALAK

OGASUNA ETA FINANTZA POLITIKA

LEHENDAKARITZA, FUNTZIO
PUBLIKOA, BARNEA ETA JUSTIZIA

HERRITARREKIKO ETA
ERAKUNDEEKIKO HARREMANAK

HEZKUNTZA

OSASUNA

KULTURA, KIROLA ETA GAZTERIA

LANDA GARAPENA, INGURUMENA
ETA TOKI ADMINISTRAZIOA

SEGURTASUNA ETA LARRIALDIAK

Foru intereseko inbertsio bezala deklaratu da “Exposición y Conservación de Alimentos, SA” enpresa-proiektua

Martzillan duen instalaziorako aurrekontua 25 milioi eurokoa da, eta zuzeneko 500 enplegu sortzea aurreikusten da

Asteazkena, 2018.eko irailak 19

Nafarroako Gobernuak gaurko bilkuran onartu du “Exposición y Conservación de Alimentos, SA” (EXKAL) enpresa-proiektua, hozkuntza komertzialean aritzen dena eta Martzillan kokatua, foru intereseko inbertsio aitortzeko erabakia. Proiektuak 25 milioi euroko aurrekontua du, eta zuzeneko 500 enplegu sortzea aurreikusten da.

EXKAL enpresa liderra da hozkuntza komertzialaren merkatuan, eta produktuak ematen dizkie Espainian elikagaien banaketako enpresa nagusiei, eta munduko hainbat herrialdetakori ere bai. Produkzio-zentro nagusia Martzillan duen arren, beste lantegi batzuk baditu Paternan (Valentzia).

Enpresaren foku nagusia iraunkortasuna da, ekologikoa, ekonomikoa eta soziala denaren arteko oreka bezala ulertuta. Haien produktuen bidez, bizitza-zikloaren kostua, emisio kutsatzaileak, energiaren kontsumoa, elikagaien galerak eta mantentze-kostuak murriztea lortu dute.

Enpresak ingurumen aldetik hartutako konpromisoa dela-eta, zenbait proiektu jorratuko ditu datozen urteetan. Zehazki, ondorengoak aurreikusi dituzte: lursail berriak erostea eta produkzio-nabe berriak eraikitzea, makineria robotizatu berria eskuratzea, ahalmena gehitzeko ildo berriak sortzea, energia berriztagarria ekoizteko gaitasuna areagotzea eta merkatu berrietara bideratutako produktu berriak garatzea.

Proiektua S3 Estrategiara bideratu da mekatronika, nekazaritzako elikagai eta baliabide berriztagarrien arloan, bereziki eremu hauetan: elikakatearen eraketa, elikadura osasungarriaren aldeko apustua, ekonomia zirkularraren sustapena, energia fosilen kontsumoaren murrizketa eta enpresaren batez besteko tamaina gehitzea.

Gogoratu behar da Exekutiboak foru intereseko inbertsio bezala deklaratu ditzakeela Nafarroako garapen ekonomiko, sozial edo lurralderako garrantzi berezia duten proiektuak. Izendapen hori lortzen duten ekimenek lehenetsuneko eta premiazko bultzada izaten dute ondoren, Nafarroako administrazio publiko guztiekin egin beharreko izapide ezberdinetan. Era horretan, esate baterako, erdira murrizten dira jarduera ezartzeko, hirigintza-plangintza egiteko edo gauzatzeko, irekitzeko edo funtzionamendurako lizentziak izapidetzeko aurreikusitako epe arrunta.